



## Zapisnik sa sastanka

**Datum i mjesto održavanja:** 19. 06. 2019. godine u prostorijama općine Dvor, R Hrvatska  
sa početkom u 10:00 sati

**Prisutni na sastanku:**

**Ispred Unsko-sanskog Kantona :**

Adnan Alagić - Ministar Ministarstva za građenje, prostorno uređenje i zaštitu okoliša Unsko-sanskog kantona i član Radne grupe za praćenje aktivnosti izgradnje odlagališta nuklearnog otpada na području općine Dvor

Jasmin Emrić - Poslanik u Predstavničkom domu Parlamentarne skupštine Bosne i Hercegovine

Nermin Ogršević – Gradonačelnik Grada Cazin

Mersudin Nanić - Načelnik Općine Bužim

Mersija Talić - Pomoćnik ministra za zaštitu okoliša i komunalne djelatnosti u Ministarstvu za građenje, prostorno uređenje i zaštitu okoliša USK-a i član Radne grupe za praćenje aktivnosti izgradnje odlagališta nuklearnog otpada na području općine Dvor

Hadis Jusić – Poslanik u Skupštini USK-a, član Radne grupe za praćenje aktivnosti izgradnje odlagališta nuklearnog otpada na području općine Dvor - ispred Skupštine Unsko-sanskog kantona

Ibrahim Mujakić – član Radne grupe za praćenje aktivnosti izgradnje odlagališta nuklearnog otpada na području općine Dvor - ispred Grada Cazin

Sead Gorinjac - član Radne grupe za praćenje aktivnosti izgradnje odlagališta nuklearnog otpada na području općine Dvor – ispred Općine Bosanska Krupa.

Radio-televizija Unsko-sanskog kantona

**Ispred Općine Novi Grad :**

Miroslav Drljača – Načelnik Općine Novi Grad

Bojan Lukač – Zamjenik načelnika Općine Novi Grad

Mario Crnković- Udruženje građana “Green Team”

Mediji

## **Ispred općine Dvor :**

Nikola Arbutina – Načelnik Općine Dvor

Milan Rudić, Zamjenik načelnika Općine Dvor

Franjo Juranović, Zamjenik načelnika Općine Dvor

Stjepan Buić, Predsjedavajući Općinskog vijeća

mediji

### **Dnevni red sastanka:**

Sastanak je održan na inicijativu Ministarstva za građenje, prostorno uređenje i zaštitu okoliša, Unsko-sanskog kantona, shodno Zaključcima Radne grupe za praćenje aktivnosti izgradnje odlagališta nuklearnog otpada na području općine Dvor, Republika Hrvatska, (imenovane od strane Vlade Unsko-sanskog kantona) sa ciljem:

1. definiranja daljih aktivnosti u rješavanja problema u namjeri Republike Hrvatske da izgradi prvo skladište, a potom i odlagalište radioaktivnog otpada niske i srednje aktivnosti na lokaciji Trgovska Gora, općina Dvor na samoj granici Bosne i Hercegovine uz rijeku Unu i pokretanju inicijative za zajedničkim regionalnim djelovanjem prema odgovornim institucijama na rješavanju ovog problema.

Prije održavanja samog sastanka u općini Dvor, na poziv Načelnika Općine Novi Grad – gosp. Miroslava Drljače u prostorijama općine Novi Grad održan je kraći sastanak predstavnika Unsko-sanskog kantona i predstavnika općine Novi Grad u cilju razmjene informacija o provedenim aktivnostima po ovom pitanju od strane Unsko-sanskog kantona, općine Novi Grad, te o nastavku daljih aktivnosti.

Učešće u diskusiji prvi je uzeo Ministar Adnan Alagić koji je prisutne informisao o provedenim aktivnostima od strane Ministarstva za građenje, prostorno uređenje i zaštitu okoliša Unsko-sanskog kantona i Radne grupe za praćenje aktivnosti izgradnje odlagališta nuklearnog otpada na području općine Dvor, Republika Hrvatska. Nakon toga Načelnik općine Novi Grad informisao je prisutne o aktivnostima provedenim od strane općine Novi Grad vezano za namjeru Republike Hrvatske da izgradi prvo skladište, a potom i odlagalište radioaktivnog otpada niske i srednje aktivnosti na lokaciji Trgovska Gora, sa akcentom na usvojene Zaključke o kojima je upoznata ministrica Srebrenka Golić, kao i Savez općina i gradova u Republici Srpskoj.

Nakon kraćih diskusija ostalih prisutnih, prvenstveno Gradonačelnika Grada Cazin- gosp. Nermina Ogršević, koji je insistirao na izradi dinamičkog plana kojim bi se tačno definisale dalje aktivnosti, rokovi i nosioci aktivnosti i obraćanja gosp. Jasmina Emrića, poslanika u Predstavničkom domu Parlamentarne skupštine Bosne i Hercegovine koji je iznio informacije o djelovanju viših institucija Bosne i Hercegovine po ovom pitanju, statusu Radne grupe formirane po ovom pitanju na nivou Bosne i Hercegovine (trenutno se čeka na imenovanje novih članova, obzirom da je za 5 članova istekao mandat), diskutovalo se o mogućnosti

podnošenja tužbe od strane Bosne i Hercegovine, regionalnom pristupu ovom problemu koji treba da je konstantno u fokusu medija i svih uključenih aktera, djelovanju prema odgovornim institucijama, kao i uključenja u rješavanje ovog problema svih potencijalno ugroženih lokalnih zajednica obe države.

Sastanak kod Načelnika općine Dvor započeo je kako je i planirano tačno u 10:00 sati u prostorijama Općine Dvor.

Načelnik Općine Dvor gosp. Nikola Arbutina, kao domaćin sastanka pozdravio je sve prisutne i dao je riječ Ministru Adnanu Alagiću, da kao organizator sastanka iznese razloge sazivanja sastanka i očekivane ciljeve.

U početku sastanka Ministar Alagić upoznao je prisutne o razlogu sazivanja sastanka, aktivnostima Ministarstva za građenje, prostorno uređenje i zaštitu okoliša Unsko-sanskog kantona i Radne grupe za praćenje aktivnosti izgradnje odlagališta nuklearnog otpada na području općine Dvor kao što su : donošenje Deklaracije o protivljenju aktivnostima izgradnje odlagališta radioaktivnog otpada u općini Dvor od strane Skupštine USK-a; organiziranje i održavanje sastanaka sa svim relevantnim po ovom pitanju; donošenja Unske rezolucije o protivljenju izgradnje odlagališta nuklearnog otpada u općini Dvor u sklopu obilježavanja Svjetskog dana okoliša u Bihaću; formiranju Radne grupe za praćenje aktivnosti izgradnje odlagališta nuklearnog otpada na području općine Dvor, od strane Vlade USK-a; održavanje sastanaka Radne grupe sa donošenjem konkretnih zaključaka, itd.... ali nije bilo rezultata. U svom obraćanju Ministar Alagić je istakao da Unsko-sanski kanton nije zadovoljan sa dosadašnjim aktivnostima sa nivoa države BiH i naglasio obavezu definisanja daljih aktivnosti i zajedničkog djelovanja po ovom pitanju.

Nakon toga Načelnik Općine Dvor - gosp. Arbutina iznio je kraću hronologiju dešavanja po pitanju odlaganja radioaktivnog otpada na području općine Dvor, koja je još usvajanjem Prostornog plana Republike Hrvatske 1999. definisana kao potencijalna lokacija. Dao je osvrt na donošenje Nacionalnog programa provedbe Strategije zbrinjavanja radioaktivnog otpada, kojim se predviđa uspostava skladišta radioaktivnog otpada u današnjoj vojarni Čerkezovac, Općina Dvor, a koji je Vlada Hrvatske usvojila 12.11.2018. godine. Općina Dvor se obraćala Ministarstvu unutrašnjih poslova Republike Hrvatske, Ministarstvu zaštite okoliša i energetike Republike Hrvatske, Vladi Republike Hrvatske vezano za provedbu Nacionalnog programa u vojarni Čerkezovac, te šta se planira u narednom periodu, a sve u cilju potpune informiranosti, Na svoja obraćanja nikad nisu dobili odgovor od insitucija od od kojih je tražen odgovor. U toku daljeg obraćanja Načelnik Arbutina prisjetio je prisutne o održavanju dvodnevne Javne rasprave o nacrtu Nacionalnog programa provedbe Strategije zbrinjavanja radioaktivnog otpada, iskorištenih izvora i istrošenog nuklearnog goriva i Strateške studije uticaja na okoliš u općini Dvor, te dešavanjima tokom održavanja Javne rasprave 2016. godine. Zašto Javna rasprava nije održana i na području Bosne i Hercegovine (Novi Grad i Bihać) i ako je bosansko-hercegovačka strana insistirala na tom, nije upoznat. Takođe, tema na kojoj je potencirao Načelnik Arbutina odnosila se i na slijedeće: da li se radi o zbrinjavanju institucionalnog otpada ili zbrinjavanju otpada iz NE Krško. Istakao je da je ova lokalna

zajednica od početka protiv lokacije Trgovska Gora i mikrolokacije Čerkezovac, što su potvrdili i Općinsko vijeće i zborovi građana.

Naglasio je da određivanje lokacije za zbrinjavanje radioaktivnog otpada traje preko trideset godina, a kakav je pristup rješavanju ovog problema može trajati još dvaeset. Smatra da i općina i građani od svega ovoga imaju samo štetu koju ničim nisu izazvali, da je zbrinjavanje radioaktivnog otpada u naležnosti države, te da ga ona mora riješiti. Stava je da se otpad treba zbinjavati na mjestu nastanka.

Gosp. Jasmin Emrić istakao je da je vrlo pogubno za cijelu regiju da dobije “nuklearnu markicu” i da je neophodno sačuvati cijelu regiju Pounja od zbrinjavanja i odlaganja nuklearnog otpada na njenom području. Istakao je da vlasti sa obje strane granice imaju pasivan odnos prema lokalnim zajednicama po pitanju planiranog odlaganja otpada, te da je stav Bosne i Hercegovine ranije definisan i jasan – NE lokaciji za odlaganje i zbrinjavanje nuklearnog otpada na cjelokupnoj teritoriji Trgovske Gore. Mišljenja je da na nivou Bosne i Hercegovine nije dovoljno urađeno da se taj stav prenese vlastima Hrvatske, a iako je prenesen, nema se dovoljno informacija. Napomenuo je da je Predsjedništvo Bosne i Hercegovine usvojilo Zaključak kojim od Republike Hrvatske traži da se iz planova za odlaganje radioaktivnog otpada izuzme lokacija Čerkezovac. Povratnu informaciju da li je stigao odgovor iz Hrvatske nema. Smatra da R Hrvatska pasivnim stavom i neodgovaranjem na protivljenja iz BiH prikriva propuste prilikom izbora lokacije za odlaganje radioaktivnog otpada. Veoma je bitno regionalno-institucionalno djelovati .

Gradonačelnik Grada Cazin - gosp. Nermin Ogršević istakao je kako je ovo regija sa preko 500.000 stanovnika sa najvećom gustoćom naseljenosti u BiH i da mišljenja Bosne i Hercegovine do sada nisu uvažavana. Naglasio je značaj komunikacije sa javnim mijenjem, ističući argumente protiv odlaganja radioaktivnog otpada na ovoj lokaciji. Ovo pitanje treba da budu prioritet i da se vrši konstantan pritisak na institucije, da se što više građani animiraju, jer administracija jeste bitna, ali se građani pitaju. Smatra da se treba izboriti da ovo pitanje ne bude problem nekoliko lokalnih zajednica, već pitanje dvije države. Radioaktivni otpad treba skladištiti tamo gdje je i nastao. Građani regije nisu imali korist od nuklearne elektrane Krško i nije ljudski i pošteno da sad trpe zbog negativnih efekata odlagališta. Istakao je da ovo pitanje može da naruši odnos dvije države i da je stav Grada Cazin jasan i decidan –NE lokaciji za odlaganje i zbrinjavanje nuklearnog otpada na cjelokupnoj teritoriji Trgovske Gore.

Načelnik Općine Novi Grad gosp. Miroslav Drljača istakao je kako je ugroženost građana nepravедna prema ovoj regiji. Smatra da još uvijek postoji realna mogućnost da to ne bude ta lokacija, posebno jer Republika Slovenija daje mogućnost da radioaktivni otpad ostane u Krškom uz odgovarajuću naknadu. Ističe da je od strane Hrvatske kao jedan od kriterija bio gdje je najmanja populacija, što je onda apsurd kada argumentuju da to odlaganje nije opasno po stanovništvo. Smatra da R Hrvatska treba da prihvati ponudu Slovenije da radioaktivni otpad iz elektrane Krško bude odlagan na lokaciji Vrbine jer za to postoji saglasnost lokalne zajednice. Ističe da na osnovu međunarodnih konvencija čije su potpisnice Bosna i Hercegovina i R Hrvatska treba naći rješenje, bilo da je riječ o arbitraži ili tužbi. Stav općine

Novi Grad je takođe jasan i decidan - NE lokaciji za odlaganje i zbrinjavanje nuklearnog otpada na cjelokupnoj teritoriji Trgovske Gore. Odgovornost je na nama svima riječi su Načelnika Drljače.

Nakon kraćih diskusija i ostalih prisutnih doneseni su i konkretni prijedlozi koje je iznio poslanik u Predstavničkom domu Parlamentarne skupštine BiH – gosp. Jasmin Emrić:

- Formira se tim za zajedničku koordinaciju svih aktivnosti u cilju sprečavanje R Hrvatske da izgradi prvo odlagalište, a onda skladište nuklearnog otpada na Trgovskoj Gori u sastavu :
  - Adnan Alagić, ministar Ministarstva za građenje, prostorno uređenje i zaštitu okoliša Unsko-sanskog kantona
  - Jasmin Emrić, poslanik u Predstavničkom domu Parlamentarne skupštine Bosne i Hercegovine
  - Nikola Arbutina, Načelnik Općine Dvor
  - Miroslav Drljača, Načelnik Općine Novi Grad
- Da se organizira regionalna konferencija (kao regionalni događaj) na kojoj bi bili prisutni svi grado/načelnici regije sa koje bi se uputio jasan stav – protiv uspostave odlagališta radioaktivnog otpada na lokaciji Trgovska Gora uz prisustvo što većeg broja medija
- Organizirati posjete ostalim županijama u okruženju u cilju dobijanja podrške
- Da se iskoristi volja Republike Slovenije – općine Krško da se taj otpad zbrine na lokaciji na kojoj je nastao
- Problem zbrinjavanja radioaktivnog otpada na Trgovskoj Gori treba konstantno da bude tema broj jedan i uz podršku nevladinog sektora i javnog mijenja u kontinuitetu slati jasne poruke vlastima o protivljenju izgradnje odlagališta nuklearnog otpada na lokaciji Trgovske Gore

Sastanak je završen u 12:30 sati.

Nakon sastanka održana je press- konferencija sa koje je poslana jasna poruka :

“Općine i gradovi u Pounju, u Federaciji Bosne i Hercegovine, Republici Srpskoj i Republici Hrvatskoj ne žele radioaktivni otpad na ovom pograničnom području i traže od vlasti Bosne i Hercegovine i Republike Hrvatske da uvažavaju mišljenje građana.”

Zapisnik sačinjen: 21.06. 2019.godine

Zapisnik sačinila:

Mersija Talić